

nel Cairo non è restà altri che 800 turchi, ma ben schiavi assai.

100 *Di sier Bortolamio Contarini orator e provedador dil regno, date a Nicosia a dì 20 Settembre.* Come va col Luogotenente a Zerines, et poi stato a Famagosta, monterà sopra una di le nostre sotil, è lì, et verà a repatriar, *licet* vegni nel cuor di l'inverno; ma vol veder le fantarie di Famagosta prima, *etiam* far la mostra a li stratioti.

*Di Famagosta, di sier Vincenzo Capello capitano, di 24 Septembio.* Come a dì 9 scrisse copioso, poi à 'uto lettere da Tripoli, da sier Piero Contarini, di 19 Septembio. Come el Gazeli havia fato retenir a Damasco Bene Cormas per farlo morir, qual fo quello prese Beneanes capo di machademi e li taiò la testà, per il che il Signor tureo li donò el paese di dito Beneanes, et felo signor di Baruto. Scrive, le do galie nostre, è lì a Famagosta, aspeta l'orator dil Signor tureo per condurlo a Tripoli insieme con una caravela con formenti e zucari a conto dil tributo; e manda la letera di Tripoli.

*Da Tripoli, di sier Piero Contarini, di 19 Septembio.* Come, laudato sia Dio, se expedi di garbugli li fo fati. Scrive l'andar dil signor di Aman Charachasa era andato in suso con zente, et Peri bassà havia passà il ponte con lo exercito et era a Albir, et cavaleha questo Carachassa e li altri verso Bagadi contra arabi et contra quelli di Cordi etc. Et il signor di Tripoli *etiam* lui à mandato zente in suso. Scrive, le cose de li passa con obedientia et timidità, et Peri bassà fa levar 200 caxe di Alepo di più richi, e le manda a Constantinopoli. Scrive, el Gazeli à fato retenir Bene Cormas, e, si dice, vol farlo morir.

*Di sier Alvisè d'Armer locotenente in Cypri, sier Bortolamio Contarini orator proveditor e Consieri, di 28 Septembio.* Come sono stati a Zerines, hanno visto, è loco importantissimo, e bisogna fortificarlo e mantenerlo. Hanno expedito l'orator dil Signor tureo con li formenti e zucari per Tripoli. Eri partì de lì da Nicosia per Saline per montar su le galie; era con lui la caravela. Di novo, il campo dil Signor tureo è a Albir. In quelli lochi di marina sono 44 fuste turchesche, 4 di le qual prese una nave, qual da li homeni era stà abandonata, di sier Matio di Prioli qu. sier Francesco, veniva di Alexandria, sopra la qual tolseno uno collo di garofoli alexandrino, e la nave riscatono con ducati 400.

Fu posto, per li Savii dil Consejo e Terra ferma, dar certa autorità a li 5 prescidenti al Colegio di la

diferentia di quelli di la riviera di Salò, di poter tra loro, per la mazor parte, terminar certi articuli. *Item*, meter quelle parte in la materia si trata, come fanno li Consieri et Savii etc., *ut in parte.* Ave 9 di no, 140 di si. Fo opinion di loro prescidenti, sier Marin Corner, sier Marin Sanudo qu. sier Francesco e sier Antonio Condolmer, quali andono in Colegio a far meter questa parte. Ave 140 di si, 11 di no et uno non sincero, et erano amalati li altri do prescidenti sier Marco Loredan et sier Zuan Venier. Et Luni li darano el Consejo.

Fu leto una letera di *rectori di Padoa, di 4.* Come li scolari erano venuti da loro a dirli lezeva domino Vincenzo da l'Ocha solo la letion di raxon civil al secondo loco, la sera; però desideravano aver per concorenti domino Alvisè Dischalzo dotor, perchè li scolari sarano meglio serviti.

Fu posto, per sier Francesco Bragadin el consier, e li Savii, dar al prefato domino Alvisè Dischalzo dotor, citadin padoan dita lectura, con salario fiorini 200 a l'anno. *Item*, metevano condur do altri insieme, come dirò di soto; et alcuni di Pregadi cridono era meglio balotar a uno a uno, et questo perchè lo tra li altri non sentiva condur questo padoan, che si apresentava a la bolla. Et cussi, si diceva do parole, non era presa; et li Savii mandono il primo solo. Et ave: 63 di no, 109 di si. Et visto le leze, fo terminà, per la Signoria, presa.

*Item*, fo posto, per li diti, condur a la lectura *de jure canonico* al primo loco, in concorentia di domino Bortolamio da Urbin, qual leze la sera, che sia scritto a Padoa debino far balotar per i scolari uno concorrente, *videlicet* domino Zuan Batista Fereto dotor, e domino Lodovico Braim dotor e altri che si volesseno meter a la pruova, con salario di fiorini 80 a l'anno. Ave 149 di si, 20 di no, et fu presa. E nota. Il Fereto è qui, e fo quello tene quelle conclusion *in jure canonico* a San Zane Polo.

*Item*, a la lectura di le clementine fu posto condur domino Agustin Fazio con fiorini 30 a l'anno, con questo al rotulo futuro sia balotato da li scolari, *ut in parte.* Ave 144 di si et 21 di no; non fu presa.

Non volse il Colegio tornar a meter la parte e commission a l'orator va in Hongaria sier Lorenzo Orio dotor, expedito per il Colegio, perchè sapeva lo e altri la voleva contradir, e volseno indusiar.

Fu posto, per li Consieri e Cai di XL, che per la Quarantia criminal, justa il solito, siano electi 100 nobeli acciò li poveri habino il modo di viver etc. Sier Vettor Michiel, el censor, andò in renga per